

Air Aruba

UN COMPANIA HOBEN CU TA KERE DEN HUBENTUD!



ORANJESTAD (AAN) -- Air Aruba, e compania nacional di aviacion, orguyosamente a yega na su di siete aniversario como linea aereo activo internacionalmente, dia 18 di Augustus ultimo.

Pa celebra su di siete aña di existencia, e presidente di Air Aruba Sr. Peter Lookhong apoya pa, y den colaboracion cu otro miembronan di e personal, a organiza un "A.B.C." rond trip, abordo di un MD 80, pa studiantenan di school basico y secundario.

Abordo di Jamanota, ayera mainta pa 10:15, un total di 105 alumno di 52 school acompaña pa algun maestro, a realiza e bunita experiencia aki, ya cu den nan mayoria nunca antes a yega di subi avion.

Diamars otro siman alumnonan di 27 otro school tambe lo haya e mesun oportunidad aki.

Air Aruba ta un compania hoben cu ta kere den hubentud, y esey ta su lema pa stimula estudiantenan pa nan cera conoci un poco cu e industria di aviacion, y tambe cu turismo.

Pa Air Aruba, cual personal ta bastante hoben, resalta e cara di Aruba atraves di su hende hoben ta di sumo importancia.

Originalmente nan kier a haci e rond trip aki den temporada di vacacion pero nan a cay un tiki laat. Como cu e lo bira un evento anual, posiblemente den futuro esaki si

lo ta e caso.

Jamanota a despegar for di Aeropuerto Reina Beatrix pa sigui bay bula riba Curacao, y di akinan pa bula riba Bonaire y pa ultimo riba Aruba mes, loke a tuma un ora y mey di tempo.

E tripulacion a consisti di e capital Sr. Kennet Leerdam, co-piloto Sr. Rene Michel, y e stewardess Grace, Ursuline, Edseline, Diane y Carmen.

E studiantenan a haya un splicacion tocante e medidanan di seguridad den avion door di un stewardess.

Splicacion tocante haltura y e sitionan riba cual e avion a haya permiso pa bula, tabata na encargo di e co-piloto Rene Michel.

Esaki ta e prome biaha cu Air Aruba ta realiza un actividad asina pa sali for di e punto di bista cu Aruba no ta exclusivamente di turismo, pero ta di Arubianonan mes, ta pueblo Arubiano ta su doño, y cu nan kier a promove asina e aerolinea nacional cumenzando cu esnan di mas chiquito cu ta Aruba su futuro.

Otro aña Aruba ta yega na su 8 aña bulando, aunque en realidad na 1996 nan lo celebra 10 aña di existencia caba, teniendo cuenta cu e dos añanan cu nan tabata den operacion "riba vloer".

Posiblemente Air Aruba lo bula pronto pa Houston y Buenos Aires Argentina. Esaki ta solamente un plan pa awor, pero cu intencionnan serio cu e lo bira reali-

dad.

Miembronan di prensa tambe a worde invita pa e rond trip aki, unda por cierto por a conversa hopi cu Gerard de Veer, Representante di e Financial Accounting Department y Juan Wever, Representante di Sales and Marketing.

EXPERIENCIA AGRA-DABLE: DIARIO a papia cu algun di e studiantenan cu a keda encanta cu e rond trip abordo di Jamanota, cual por cierto enberdad nunca antes a yega di subi abordo di un avion.

Nan ta "confesa" cu na principio nan a sinti un tiki nervio ora avion a cumenza subi, pero despues tur cos a bira normal y nan a goza un mundo di e keiro aki.

Nan no tabata imagina nan mes con un avion ta paden, mucho menos con cos ta den cabina, y ki equipo tin eyden. Den gruponan di 5 mucha nan por a pasa observa esaki.

A yama nan atencion con berde Curacao ta muestra, y ademas cu Bonaire no ta parce un isla asina chiquito manera nan por a pensa.

E muchanan a pasa greit, a haya un regrigerio tambe (refresco, sandwich, juice y un chuculati), ademas di un recuerdito di Air Aruba pa nan no lubida e dia aki.

BUNITA TRATO: DIARIO ta cera cu broche di oro e articulo aki cu palabranan di danki na e tripulacion cu a sa di duna tanto e invitadonan studian-



til, maestronan y prensa un trato hopi cordial, conversando cu un y tur, contestando pregunta, y na tur momento cu un smile amistoso.

Tambe mester elogia e bon comportamiento di e muchanan y e forma bon organiza-

con e actividad aki a bay den otro.

Esnan cu lo bula Diamars awor cu Dios su poder, por spera un trip hopi interesante.

Ta masha dushi bula abordo di Air Aruba, e compania hoben cu ta kere den hubentud!

